



**PREMIU DE POESIA SARDA
"REMUNDU PIRAS"
XXII^ Editzione**

de Domitilla MANNU

Su 31 de austu in Biddanoa Monteleone cun sa tzerimònia de premiatzione s'est congruida s'editzione sa de XXII de su Prèmiu de poesia sarda "Remundu Piras". S'Assòtziu Culturale Interrios, ocannu pro s'occasione at ammaniadu unu cùmbeniu intituladu " Remundu Piras, su poete de piata". Est nòdidu e reconnòschidu in totue chi su poete biddanoesu est istadu su mezus poete de palcu de Sardigna e comente li meressit e deghet, sa bidda li faghet onore, ammentende-lu in medas ocasiones. Sa serada est istada abberta dae Bastianino Monti, chi at saludadu e s'est chensciadu chi sos agiudos pùbblicos sunt semper menguende. At torrada gràtzias a totu sos chi ant agiudadu pro sa resessida de custa editzione, Istitutziones pùbblicas, Parròchia de Santu Nenaldu, Coro de Biddanoa Monteleone, Coro femminile "Duennas", Cooperativa Allevadores, Villanova carni, Jerry formaggi, Domus de Janas de Fabio Pillonca, Soter editrice, Su Sòtziu de sa Misericordia e s'Isportellu Linguisticu de Biddanoa Monteleone. At ammentadu chi s'Assòtziu dedicat un'àtera die pro premiare sos pitzinnos chi cuncurrunt a sas duas setziones riservadas a issos e at postu a cabu chi dae s'annu nou sa premiatzione s'at a fàghere in una de sa duas chidas in antis de Mesaustu. A pustis de su saludu de su sindigu de Biddanoa e nebode de su poete, Chirigu Meloni, est tocadu a Nenardu Riu, presidente de s'Assòtziu Interrios, unu giòvanu impignadu meda in sa vida culturale de sa bidda. At faeddadu de s'importàntzia de sa poesia e de faeddare su sardu, pro trasmitere a sos

pitzinnos sos sinnos de s'identidade nostra. No at connotu a Remundu Piras ma nd'at faeddadu a manera cumprida ca nd'at leadu cabu dae sos mannos e at fatu su resumu de s'istima de sa biddu pro su Poete e de cantu sos biddanoesos si nde sient semper tentos mannos, cun custas peràulas "podimus nàrrere a seguru chi Remundu Piras est istadu, Profeta in pàtria".



Frantziscu Piras, fizu de su poete, ammentende su babbu at nadu chi in domo sua non si faeddaiat de poesia, s'ingiantu chi non b'esseret calchi istranzu. " Babbu fit un'òmine severu, forte, non l'apo mai bidu una làgrima in ojos, ma poto torrare gràtzias a Deus pro àere àpidu unu babbu che issu", at sighidu, nende chi, però, ischiat dare in su mamentu giustu, un'abbratzu de consolu o de afetu. Maria Sale, poetessa Tzaramontesa, at dadu testimonia de cantu Piras fit pretziadu e at contadu su chi est cumbinadu in Tzaramonte in una gara in su 1970; cuss'annu sa giuria, sena peruna rejone, no l'assigneit su prèmiu ma sos amantiosos e sustenidores non si caglieint a sa muda, ma peseint alta sa boghe pro criticare cussa detzisione male leada.

At cumpridu sos interventos Pàulu Pillonca, Presidente de sa Giuria, cun una relata, maicantu pretziada e rica de ammentos, ligada cun sas otavas pius deghiles a intremesu e cumpridura de sos contos de sa carriera longa de Piras, comintzada e cumprida in sa piata de Montresta. At faeddadu de s'iscola de poesia, chi "at tentu in Biddanoa sa funtana sua pius bundante e frisca", e at fentomadu sos nòmenes de cussos poetes chi nd'at fatu parte. At acabbadu ispieghende cantu siet de importu, pro su poete, sa sintonia cun sa piata, proite in sa gara, "su poete est sa piata e sa piata est su poete". Bastianino Monti at torradu gràtzias a totus e at sighidu cun sa premiatzione de sos poetes binchidores.

Pro sa setzione, sa de tres, abberta a sa poesia in rima, at leadu su primu prèmiu su poete Salvatore Murgia de Macumere cun sa poesia "A chistionu cun su entu"; su segundu prèmiu est istadu assignadu a su poete Franco Piga de Romana pro sa poesia "Fiamaridas"; su tertzu prèmiu a su poete Giangavinu Vasco de Bortigale pro sa poesia "Amo...". Su prèmiu ispeciale de su Presidente Onoràriu de sa Giuria Màriu Màsala est istadu assignadu a su poete Salvatore Irranca de S'Alighera pro sa poesia "Elvas de oe". Sunt istadas assignadas bàtoro mentziones de onore a sos poetes: Giuanne Chessa de Torpè pro sa poesia "Ti si pintat"; Giuanne Soggiu de Bunnànnaru pro sa poesia "Sos isfainados"; Domìnicu Anghelu Fadda de Thiesi pro sa poesia "Su risu pone in bia"; Maurìziu Faedda de Ittiri pro sa poesia "Amore mortore".

Pro sa setzione sa de bàtoro, abberta a sos poetes nàschidos e residentes in Biddanoa Monteleone su primu prèmiu est istadu assignadu a Antoni Nieddu pro sa poesia "Sa decadèntzia"; su segundu a Sabustianu Nieddu pro sa poesia "Tia Marianna". Sas mentziones sunt istadas assignadas a sos poetes : Lucia Idili pro sa poesia "Paba Franziscu"; Nicoletta Sechi pro sa poesia "S'aju 'e su sole"; Salvatore Meloni per la poesia "Pinturas de ijerru". Totu sos premiados ant retzidu, produtos locales, ozetos de artisanadu, libros. Unu giornaleddu cun totu sas poesias premiadas est istadu dadu a s'indonu a totu sos presentes.

Tàtari 6/9/ 2013